

Èkwo-ozì, Pòlu Deru Nù Ndu Filipayi

¹ Oo mbedua, bu Pòlu; mu lẹ Timoti, bu ndu l'ejeru Kéreshi Jizọsu ozi l'ede èkwo-ozì-a anụ ndu-nsọ ono, bu lẹ Filipayi g'èphe hakọta; mbụ ndu ono, èphe lẹ Kéreshi tųgbaru buru nanụ. Anyi edekwa iya phọ anụ ndu-ishi Chìochi phẹ mẹ ndu ejeru Chìochi ozi.

² Gẹ Chileke, bu Nna anyi; mẹ Nnajiuphu, bu Jizọsu Kéreshi meeru unu eze-iphe-ọma; mekwaaphọ g'unu buru l'èhu-guu.

Pòlu epfu anụ Chileke l'opfu èhu ndu Filipayi

³ Mu ekeleje Chileke mu ekele iphe, bukpooteke mu ritaru unu. ⁴ Tekenteke, mu epfukpọo opfu èhu unu g'unu ha anụ Chileke bẹ mu egudeje èhu-utso epfu iya. ⁵ Noo kele e -shi ke mbọku mbụ ono, unu nọmaru ozi-ọma ke Kéreshi ono bẹ unu shièpho e -shi teke ono eyeru mu èka l'anọdu asa ozi-ọma ono asasa g'a nọmadzuru gbiriri jeye nta. ⁶ Iphe lanụ, mu ka akọta ọhu bu lẹ Chileke ono, bu iya bu onye wataru eme iphe-ọma ono l'èhu unu ono bẹ l'e-gudeèpho nno eme jeye teke oo-mefufu iya l'ishi lẹ mbọku ono, Kéreshi Jizọsu a-bya ono. ⁷ Noo egube ọriri, mu arijeru unu bu ono; kele ọo iphe, gbaru mu l'ememe; eshinu unu nọ mu l'ọkpoma. Noo kele g'unu ha bẹ anyi l'unu tųkoru gbaru mgba l'eze-iphe-ọma ono, Chileke meru mu ono. Mu nọ lẹ mkpọro nta-a; anyi l'unu tųkokwapho

gbaru mgba l'eze-iphe-oma k'agbaru ozi-oma ono odzori; bya agbakwarupho mgba l'eze-iphe-oma k'anodu eme iya g'o shihu ike. ⁸ Sụ-a; o kwa Chileke bẹ bu onye maru l'oo okpobe-opfu bẹ mu epfu sụ l'oghoroko unu g'unu ha du mu shii; ono buru n-yemobu ophu shi l'eka Kéreshi Jizosu.

⁹ Iphe, mu anoduje epfu anu Chileke bu g'o mee g'obu ono, unu yeru nwibe unu ono nodu akaepho shii eje; wakwapho g'unu kabaa amaru Chileke okpobe amaru; me g'unu du ike marwetaje iphe, gbaru unu l'ememe. ¹⁰ Oo ya bu g'unu aduje ike hotaje iphe, ka ree mee; k'ophu bukwanu mboku ono, Kéreshi ekpe ndiphe ikpe ono rwuepho; oolewaro l'unu doberu onwunu oru; o to duedu iphe, oo-ta unu uta iya; ¹¹ elekwapho l'umere, unu shikpoo meta le ndzu unu l'ophu bukota umere, pfuru oto, shi Jizosu Kéreshi l'eka; umere l'e-me ge ndiphe kwabe Chileke ubvu; jaa ya ajaja.

Egude ndzu onye egoshi l'a no-doru Kéreshi

¹² Unwunna mu; iphe, mu eme g'unu maru bu l'iphe ono, dapfutaru mu nu ono be gbẹ yetabakwaanu eka g'ozima ono kabaanu edzuru mgboko. ¹³ Noo kele iphe, bukotakpoo ndu ojogu, eche nche l'ibe onye eze; mewaro iphe, bu ndu ozo be tukowaru makotaru nta-a l'oo le mu ejeru Kéreshi ozi be meru g'o gude a tua mu mkporo. ¹⁴ Nta-a be mkporo-a, a turu mu-a mekwaru; ikpoto unwunna, anyi l'ephe kweru ke Kéreshi tukowaa buru ndu obu kabawaa eshihu ike; k'ophu ephe kabaa asa ozi-oma ono kpaakpaa; ophu o dudu onye ephe atsụ ebvu.

¹⁵ A makwaru-a l'o nweru ndu gude ɛnya-pfurupfuru ezi ozi-oma ke Kéreshi obu; mbu ndu ezi iya nu g'iphe, eeme l'opfu; ɔle o nwekwaru-a ndu ophu gude obu iphóró ezi iya. ¹⁶ Ndu k'ono, gude obu iphóró ezi iya ono be ezi iya nu; opfu l'ephe yeru Kéreshi obu. Noo kele ephe maru l'oo ya be kuru mu ge mu bya agbajeru ozi-oma ono odzori. ¹⁷ O be le ndu ophu ezi iya nu g'o bu iphe, eeme l'opfu pho; egudedu obu phe ezi iya ono; bu iphe, ephe emelepho bu g'iphe-ehuka-a, mu eje le mkporo-a, mu no-a kabaa shii.

¹⁸ Ole o bu; ?mu eyekwanuru phe onu? Mbu-a; ?e gude obu iphóró epfu iya-o; ?o bu l'o nweru iphe, ndu epfu iya nu vu l'uche epfu iya-o; iphe, o bu; iphe, o bu; g'e pfu iya nu mee g'opfu ehú Kéreshi ono jedzuru mgboko. O kwa iphe ono e-me g'ehu tsoo mu utso. Mbukwa ehú je anodukwaro atsowa mu ro nno. ¹⁹ Kele mu maru l'eshinu unu anoduje epfu anuru mu Chileke; teme Unme Jizosu Kéreshi nodu anoduje eyeru mu eka be mu maru l'ee-mechaa haa mu. ²⁰ Iphe, mu dobekporu ɛnya doreshia ya ike bya aburu iphe, mu ele ɛnya iya bu le g'iphe aduhabe be mu ta abyadu emeru iphere nu onwomu l'iphe, bu iphe, mu eme. O chia iphe, obu eshihuje mu ike mu eme iya; mbu emekwa iya eme iya nta-a ge mu shi emehawa iya; bu le mu e-gude ndzu mu g'o ha ekutse Kéreshi; ?o bu mu le ndzu? ?o bu mu l'onwu?

²¹ L'ehu nkemu be bukwa; mu -nodu ndzu; mu anodoru iya Kéreshi; teke mu nwuhuru anwuhu; ono a-buwaruro urwu gbaaru mu.

²² Obenu teke ọ bụ ị mu nọ ndzụ l'eli-mgboko-a bẹ mu a-ka ejetaru Kéreshi ozi; ọo ya bụ ị mu ta maedu ọphu mu a-hata. ²³ Uzi iphe labo ono bẹ mu pfuru l'echi. Epe tuko alo mu ibekeboebo. Ole ọphu ẹgu iya agushi mu ike bụ ẹ mu laa lapfu Kéreshi ẹ mu l'iya nọdu. Ono ka mu ree ọkpobe akaka. ²⁴ Obenu l'ọ kakwanurupho unu ree ọkpobe akaka ẹ mu nọdu ndzụ swibaaru unu. ²⁵ Eshi ọphu o doru mu ẹnya ẹgube ono bẹ mu maru ị mu a-nọdu-a ndzụ nọdu swiru unu g'unu ha; yetajeru unu ẹka g'ehu-utso unu akabaa shi, bụ iya bụ ẹhu-utso, shi l'ekweta unu. ²⁶ Ọo ya bụ; teke mu l'unu nọepfo ọzo g'unu a-kabaa enweru iphe unu a-zobe gude mu aba abaa; eshinu mu l'unu tukuru buru ndu epe ị Kéreshi Jizosu tugbaru buru nanu.

²⁷ Ole g'ọ dūhabe; unu mejeekwapho umere, gbaru onye anu ozi-oma ke Kéreshi ono; ọo ya bụ g'oo-bukwanuru: mu -du ike bya ndu unu; ọzoo ị mu ta aduhedu ike bya; mu anule-a l'unu gude obu lanu pfuru pfushia ike; anukwapho l'unu ese iswi ekwekwe ono, unu kweru k'ozima ono. ²⁸ Unu te ekwekwa g'ọ duru iphe, ndu opfu unu e-gude yee unu ebvu ilile. Ọo iphe ono l'e-goshi phe l'ọo epebedua l'emechaa laa l'iswi; unubedua a-buru ndu aa-dzota. Ọ buru Chileke a-tuko iya mekota. ²⁹ Kele unubedua bẹ Chileke mewaru g'unu kweta ke Kéreshi; wafua g'unu jeje iphe-ehuka l'opfu ẹhu iya. ³⁰ Nta-a bẹ mu l'unu gbaakwaa mgba alwu ọgu ono, mu shihawaa alwu ono, bukwa iya pho bẹ mu alwu nta-a. Teke ono, mu shi alwu iya ono bẹ unu gude ẹnya unu huma iya. Ole nta-a buwaa ị nchi bẹ

unu anụ iya.

2

Anwụ ẹka Kéreshi

¹ Ọo ya bụ; ekweta unu kwetaru ọ́ kéreshi; ọ́o meru obu shihu unu ike tọ́? Obu onó, o yeru unu onó ọ́l'ọ́ dúje-a unu obu? Ọ́unu lẹ́ Unme-dụ-Nsọ́ tų́gbaru-a búru nanụ́? Ọ́unu emejeru-a nwibe unu odoó? Mbụ-a; ọ́unu aphụjeru-a nwibe unu obu-imemini? ² Ọo ya bụ; unu mee g'ẹ́hu tsoo mu ụ́tso tsofu mu iya l'ishi. G'egomunggo unu bújeerupho nanụ́; n-yemobu unu abụru nanụ́; obu unu mẹ́ uche unu abụkwarupho nanụ́.

³ Unu ta akpajekwa ẹ́nya l'iphemiphe, unu eme. Ọ́phu unu ekujekwa onwunu iphe, unu ahadụ́ g'ọ́o ya l'iphe, unu emekpọ́o ememe. Unu wozeje onwunu alị́ l'ẹ́ka nwibe unu nọ́. G'onnyemonye rijeepho l'iphe, gbaru k'ememe bụ́ g'a ka akwabe nwibe iya ụ́bvù; eme lẹ́ yẹ́bedua. ⁴ G'ọ́ tọ́ dúkwa g'unu ha onye búepho iphe, a-duru iya lẹ́ ree bẹ́ ọ́onoduje achọ́ kpurumu; ọ́ kwa g'onnyenonu chọ́jekwa iphe, a-duru ndu ọ́zo lẹ́ ree kwaphọ́.

⁵ G'uche unu yẹ́ ọ́ kéreshi Jizosu bújeru iphe lanụ́.

⁶ Jizosu bẹ́ shiẹ́pho lẹ́ mbụ́ dúepho gẹ́ Chileke dú.

Ọ́phu ọ́ dúdu teke ọ́ rijeru l'adudu onó ọ́ dú gẹ́ Chileke onó bẹ́ ya tee wofubaedu ẹ́nya.

⁷ Ọ́ chia iphe, o mechiaru bú l'o meru onwiya

onye adudu iphe, o bu;
 bya eworu onwiya
 mee nwozi.

E mee ya o buru nemadzu.

⁸ Eshinu e meru iya o
 buru nemadzu;
 be o wozeru onwiya ali;
 bya ekweta anwuhu;
 mbukwa anwuhu
 k'eli oswebe.

⁹ Noo g'o gude Chileke
 wolikwanaa ya eli;
 o kakota iphemiphe l'eli.

O bya agua ya epha,
 kakota shii l'iphe,
 bu epha, aazaje azaza;
¹⁰ k'ophu iphemiphe,
 du l'imigwe;
 me ophu du l'eli
 mgboko owa-a;
 me ophu du le mkpula
 ali a-buru;
 ephe -numaepho epha
 iya ono;
 ephe egbushi ikpere;
 baaru iya eja;
¹¹ waa k'ophu onyemonye
 e-pfu iya hoo haa
 l'oo Jizosu Kereshi bu
 Nnajiuphu;
 shi egube ono kwabe
 Chileke, bu Nna ubvu.*

* **2:11** 2:11 Gūnaa Azá 45:23.

Aburu ìphóró, dù l'òchii kẹ mgboko-a

¹² Ọo ya bụ; ndu mu yeru obu; teke mu l'unu shi nọdu bẹ unu shikpọekwapho anuru mu opfu. Unu kabakwaa mu anuru opfu nta-a, mu nọ unu ụzenya-a. Unu gude ndzụ-agụgu mẹ ẹhu-anmanma; meje g'a maru l'adzọtawaru unu. ¹³ Noo kẹle ọo Chileke bẹ bụ onye ereshi ire ike l'ẹhu unu. Ọo ya emeje g'unu chĩa ìdzù mee iphe, dù iya ree l'ọkpoma; mee ya g'ọ tüberu.

¹⁴ Sụ-a; iphemiphe, unu eme; unu ta agụjekwa aphụ me iya; ọphu unu alojekwaru ntumego ye iya. ¹⁵ Ọo ya bụ k'ọphu unu l'a-buru ndu adụkpodaa iphe, aata unu ụta iya; unu aburu ndu dūebe ree; tẹme unu abụkwarupho unwu Chileke; ndu adudu iphe, ẹphe gude merwushia onwophe l'echilabọ ẹjo ọgbo-a, egomunggo swehuru; tẹme ẹphe nọdu anọduje eme ẹjo ememe-a. Ọ buru l'echilabọ phe bẹ unu nọ egbu nwjiiwii g'ìphóró lẹ mgboko-a; ¹⁶ mẹ unu -gude opfu ono, l'anụ ndzụ ono ewopfu phe. Ọo ya bụ gẹ mu enweru iphe, mu e-gude eku onwomu mbọku ono, Kéreshi a-bya ọzo ono; k'ọphu ọso ono, mu agbakpọo ono mẹ akanya ono mu ese ono taa bụduru mu ọla-l'iswi.

¹⁷ Ọphu ọ dukwa mẹ obetaru e gbua mu gbashi mee mu l'ekweta, unu kwetaru waa l'ozi unu eje bẹ ẹhu a-nọdulekwa-a atso mu uto; mu l'unu atukolea ete ẹswa. ¹⁸ G'ọ bụkwarupho nno bụ g'ẹhu l'a-nọdu atso unubẹdua uto kwaphọ; mu l'unu etekwaphọ ẹswa.

Timoti yẹ Epafurodayitosu

19 Mu arikwa lẹ Nnajiuphu, bu Jizosu eme mu-a gẹ mu zia Timoti g'ọ bya agbaphee unu; k'ọphu ọo-bya akọoru mu g'unu eme ala; gude ọa mu obu. 20 Ọ tọ ọdekwa onye ọzo, mu nweru, ọ gẹ Timoti, bukwanu onye ọriri ẹhu unu echije ẹhu. 21 Ndu ọzo g'ẹphe ha bẹ abujeerupho ọriri ẹhu pẹ bẹ echije pẹ ẹhu. Ọphu ẹphe ari-vujeedu iphe ọphu buwaa kẹ Jizosu Kéreshi l'ọriri. 22 Obenu lẹ Timoti bẹ unu mawaru-a l'o goshiwaru onwiya lẹ ya bu onye gbaru g'e gude ire iya ẹka. Kẹle o shi teke ono ejeru mu ozi gẹ nwa ejejeru nna iya lẹ k'ozi-oma ono mu l'iya eje ono. 23 Ọo ya bu lẹ mu arikwapho lẹ mu e-zi Timoti ono ibe unu ẹgwegwa mẹ mu -bebeepho maru g'oo-mechaa nwọaru mu. 24 Teme mu gudekwapho Nnajiuphu ẹka l'ọ tọ ọdudu gẹ mu anọ-beru; mu abyawaa agbaphee unu l'ishi onwomu.

25 Mu byakwapho arija lẹ mu zifutajẹ Epafuro-dayitosu, bu nwune mu bya aburu onye mu l'iya tukoru eje ozi k'alwu ọgu ẹhu Kéreshi ono; bukwarupho onye ono, unu ziru g'o wotaru mu iphe ono, mkpa iya shi duru mu ono; g'ọ bya ndu unu. 26 Noo kẹle oghoroko unu g'unu ha bẹ shiwaa ọzenya ọta iya; mbu l'o shihawaa ọzenya tsuta iya l'ẹhu l'unu nọmaru l'iphe shi eme iya. 27 Iphe shikwaa eme iya eviya; k'ọphu o ghuduru nwanshi mẹ ọ nwuhu. Ọle Chileke phuru iya obu-imemini. Ọ tọ budua yẹbedua nwẹkiya bẹ ọ phuru iya. Ọ phukwaru iya pho mbẹdua; ọ-buru-abu mẹ aphu atso mu ishi labo. 28 Ọo ya bu l'ọ gbenu ka mbẹdua ehe ihee gẹ mu zikebe iya g'ọ bya g'unu l'iya kwee; k'ọphu

ẹhu a-tsokwanu unu uto l'unu gude ẹnya unu huma iya ozo; ge mbedua agbabuhukwanuru iya egomunggo. ²⁹ Oo ya bu; unu gude ẹhu-uto gbobe ẹka labo nata iya okpobe anata; lo bu nwanna, unu l'iya me Nnajiuphu tukoru tugba buru nanu. Unu kwabejekwa iphe, bukpo ndu du ge yebedua ubvu. ³⁰ Noo lo phoduru nwanshii me ishi iya abaa l'eje ozi Kereshi. O mia ẹnya le ndzu iya; emeru mu iphe unu gege anodu emeru mu.

3

Okpobe apfubekoto

¹ Su-a; ẹka mu a-suberu iya unu ishi; unwunna mu; bu g'unu nodu Nnajiuphu l'ime tee eswa. O to tsukwa mu l'ẹhu edepuru unu iphe, mu dehawaru azu; noo kele oo-me g'unu kabaa egude ẹka l'iphe, mu pfuhawaru unu ono. ² Unu kwabekwaru ndu ono, bu nkuta ono ẹnya; mbu ndu ono l'anoduje eme ejo ememe ono. Unu kpakwaru phe l'aphara; mbu ndu ono, ekebutaje nemadzu ekebuta g'o bua ubvu ono. ³ Kele oo anyibedua buru okpobe ubvu; mbu anyibe ndu gude Unme-du-Nso abaru Chileke aja; teme anyi nodu anoduje l'ẹka Kereshi Jizosu ete eswa; ophu o dudu iphe, anyi guberu iphe, eeme l'anu-ẹhu.

⁴ Ome oo iphe, eeme l'anu-ẹhu adzoje nemadzu me o buru mbedua gege asuje loo ya a-dzo mu. O -buru lo egube nemadzu onye

bụ l'adzoje iya; mę ọ -bụru mbedua gege enwechiaru iphe, mu g'a-zobeje sụ l'ọo ya l'adzo mu. ⁵ Noo l'a nwuru mu; mu noepho abali esato; e bua mu ubvu; mu buru onye Izurelu gedegede; mu buru onye okpa-ipfu ke Benjaminu. Mu bukpo onye Hiburu; mbu okpobe nwa, ndu Hiburu nwuru. A -bya l'eme iphe, ekemu ndu Jiu pfuru; mu buru onye Farisii. ⁶ A -bya le k'iphe, aphu l'ehu be mu shi buru onye achi nta Chiochi. A -bya le k'iphe, ekemu pfuru sụ l'ọo ya bu onye -meru iya nu; onye ono aburu onye pfuberekoto; ono ta adukwa ophu aata mu uta iya le mu mesweru. ⁷ G'ọ duhabe; iphemiphe ono, bukota iphe, mu shi anoduje ari l'ọo iphe, a-baru mu urwu ono be mu gudeakwa iswi ehú Kereshi wofukota enya; guru iya ye l'iphe, bu mu iphe, ọla-l'iswi. ⁸ O to budua iphemiphe ono; iphemiphe ozo be mu tukokwaru gukota l'iphe, tukoru buru mu ọla-l'iswi; kele urwu ophu rwuberu mu eka, bu ophu nyiberu g'atu onu iya, be bu Kereshi Jizosu, bu Nnajiuphu mu ono, mu mawaru majia enya ono. O buru l'iswi ehú iya be mu gude wofukota enya l'iphemiphe, mu nweru g'ọ buru iphe, iyi yifuru. Nta-a be ephe bukotawaa ntụ ekpofu l'enya mu; k'ophu bu l'ọ buepho Kereshi be bu urwu, mu e-rita nwekinyi iya. ⁹ Mę k'ophu mu e-goshikwanu le mu l'iya tugbaru buru nanu. Ophu mu emeudu g'a suje le mu bu onye pfuberekoto, bu ophu shi l'eme iphe, ekemu pfuru; o buwaru ophu shi l'ekweta ke Kereshi. O buru ono bu apfubekoto ophu shi Chileke l'eka bya eshikwapho l'eka ke

Kéreshi. ¹⁰ Gẹ mu amaru iya; maru ike ono o gude shi l'õnwu teta dzuru ndzu ono; mẹ gẹ mu lẹ Kéreshi ọbu atuko gbaru mgba l'iphe-ẹhuka ono, o jeru ono; mẹ gẹ Chileke emee gẹ mu du gẹ Kéreshi l'anwuhu ono, o nwuhuru; ¹¹ k'ophu bu lẹ g'ọ duhabe mu eshi l'õnwu teta nõdu ndzu.

Agba ọso gbafu iya l'ishi

¹² Iphe, mu epfu ta abukwa l'o rwwaru mu ẹka erwurwu; ophu o bukwa lẹ mu dukotawaa ree; ọle iphe, mu anọduje adzọbaa bu gẹ mu nata obunggo ọso, mu gbaru; eshinu Kéreshi Jizosu natawaru mu mee mu buru nkiya. ¹³ Unwunna mu; mu ta asukwaru lẹ mu natawaru obunggo ọso ono; obenu l'iphe lanu, mu emejekpọepho kpurumu bu lẹ mu atukoje iphe, mu towaru azu zohashichaa kukebeepho ẹhu agba agbapfu ophu nõ mu l'uzo iphu. ¹⁴ Mu anọduje adzo gẹ mu gbafu ọso ono l'ishi; k'ophu mu a-nata obunggo, bu iya bu ndzu ojejoje ono, Chileke shi l'ẹka Kéreshi Jizosu kua mu gẹ mu bya anata l'imigwe ono.

¹⁵ Oo ya bu; g'iphe, bukotakpoo anyibe ndu kawaru ẹnya l'iphe ke Chileke bukwarupho ẹgube iphe ono, mu ari ono be ephe l'a-nọduje ari. O -bukwanuru l'o nweru g'ọ du; unu haru ari iphe ọzo be Chileke e-goshikwa iya-a unu g'ọ doo unu ẹnya. ¹⁶ Oo ya bu lẹ-a; eshinu anyi gbawaru ọso ono gbarwua ya l'ishi; g'anyi mejeekwapho iphe ono anyi mehawaru ono.

¹⁷ Unwunna mu; unu tuko g'unu ha meje gẹ mu eme. Anyi egoshiwaa unu iphe, unu e-meje. Unu tuko nwutaepho ẹka ndu ono, eme iphe

ono, anyi egoshi unu ono. ¹⁸ Mu pfuhawaru unu iphe-a ugbo olemole; nta-a bẹ mu gudeakwaa ẹnya-mini ẹkwa epfuphuru iya unu azu; sụ l'o nweru ikpoto ndu umere phẹ egoshi l'ẹphe bụ ọhogu oswebe Kéreshi. ¹⁹ Ndu ono e-mechaa laa l'iswi; kele ọo iphe, a-la phẹ l'ẹpho bụ chi phẹ. Ọ bụru iphe, iphere iya gege aduje phẹ bẹ ẹphe egudeje aba l'abaa. Ọ bụerupho l'iphe ke mgboko-a bẹ ẹphe woru uche phẹ dobe. ²⁰ A bya abya l'anyịbedua; ibe k'anyi bụru imigwe. Ọ bụru l'ẹka ono bẹ Onye-Ndzoṭa anyi ono, anyi ele ẹnya iya eleshi iya ike ono e-shi bya, bụ iya bụ Nnajiuphu anyi, bụ Jizosu Kéreshi. ²¹ Ọo ya bụ onye l'a-gbanwe ogwehu anyi-a, adudu iphe, ọ bụ-a; mee ya l'ọ dū g'ogwehu nkiya, l'egbu nwiiinwii. Ike, oo-gude mee ya bụ ike ono, o gude emekota iphemiphe g'ọ lwa iya lẹ mkpula ono.

4

Iphe, gbaru ndu ke Kéreshi l'ememe

¹ Ọo ya bụ; unwunna mu, mu yeru obu; unu pfuru pfushia ike l'ẹka Nnajiuphu. Oghoroko unu egbukwa mu egbugbu. Ọo unu bụ ẹhu-utso mu; ọ bụkwarupho unu bẹ bụ obunggo, mu e-gude aba abaa. Mu yeru unu obu shii.

² Mu arwọ unwanyi labo ono, bụ Yuwodiya yee Sintiki sụ g'obu bụru phẹ nanu l'ẹka Nnajiuphu.

³ Teme gubedua kwapho, bụ okpobe ọnyà; mu l'iya tukoru eje udu ozi lanu; mu arwọkwa ngu pho sụ g'i yejeru unwanyi ono ẹka g'ẹphe meje iphe ono, mu suru g'ẹphe me ono; noo l'ẹphe sekpooru akanya ezikashi ozi-oma ono; mekpoo

Kelementi yēe ndu ɔzowaro, bu ndu anyi l'ēphe jegbaru ozi ono; bu ndu ēpha phē dukota l'ēkwo, Chileke deshuru ēpha ndu a-nɔ ndzū ojejoje.

⁴ G'ēhu tsojeepho unu ɔtso l'ēka Nnajiuphu tekenteke. Gē mu pfuphukwa iya azū ɔzo; g'ēhu tsojeekwapho unu ɔtso.

⁵ Unu meje iphe l'orwuberu iya gude goshije ndiphe l'unu bu ndu obu ɔma. Nnajiuphu nɔakwa ntse. ⁶ G'ɔ tɔ dukwa iphe, unu e-jeje ayɔ ɔshi iya. Iphe, unu e-mejehia bu g'unu pfujeru nu Chileke gude kajeru iya iphemiphe, mkpa iya duru unu; unu ekelejekwa iya phɔ ekele.

⁷ Ɔo ya bu; g'ēhu-guu kē Chileke, bu iya kwata dakiri gē nemadzū e-gude uche iya maru; aburu iphe, e-wota obu unu mē uche unu kwachia l'ime Kéreshi Jizosu.

⁸ Ɛka mu l'a-suberu iya unu ishi unwunna mu bu; g'iphe, l'e-shitajeepho unu l'uche buru ɔriri k'iphe ono, bukota ɔkpobe-opfu ono; mē iphe, bukpo iphe, gbaru kē g'e yeru iya ùbvù; mē iphe, bu iphe, pfuru ɔto; mē iphe, bukpo iphe, e te merwuduru emerwū; mē iphe, bu iphe, dū ree l'ēnya; mē iphe, ɔnu tukoru wukoo nanu l'ɔ dukota ree; mē iphe, dū ùbvù; mēkpoo iphe, bu iphe, aaja ajaja. ⁹ Unu meje iphemiphe ono, unu nwutaru lē ndzū mu ono; mēkpoo ɔphu mu ziru unu ezizi; unu emekwaphɔ iphemiphe, unu nūmaru mu l'ɔnu; mē ɔphu unu gude ēnya unu hūma l'ēhu mu. Ɔo ya bu; Chileke ono, emeje g'unu buru guu ono eswiru unu eswiru.

Pɔlu ekele ndu Filipayi ekele kē ree, ēphe meru iya

10 Sụ-a; ẹhu atso mu uto l'ime Nnajiuphu; kele nta-a be unu byawaru bya emeaharu mu ree ozo. Iphe, mu epfu ta abukwa l'unu ta anodujedu epfu opfu ẹhu mu; o chikwa uto te eshidu adujeru unu g'unu mee ya l'eka. 11 Mu te epfukwa l'o nweru iphe, uko iya duru mu; le mbedua nwutaakwaru g'iphe, mu nweru g'o hahabe phujeru mu l'enya; m'obetaru o nodu anwuru mu inwuagha. 12 Mu maru g'a bujeru onye ejo eka duru; bya amaru g'a bujeru onye nweru iphe. Liphe, bukpo eka mu no be iphemiphe ono mewaru mu; ebe o duedu iphe, abujekwaduru mu enya-aphapha l'ehu nkemu; mbu le mu rijiru epho; ozo le mu no egu; ? mu nweru iphe; me mu te enwe-o; mu anokirishilekwaa. 13 O to dudu iphe, mu ta adudu ike emekota; noo l'oo Kereshi be bu onye emeje ike adu mu k'ememe iya.

14 Sụ-a; unu nweru obu oma l'eka mu no; yetaru mu eka teke ono, mu shi eje iphe-ehuka ono. 15 Tem e unube ndu Filipayi l'onwunu maru le teke mu watakporu ezi ozi-oma ono le mbu; ge mu lufutaru le Masedoniya be o to dudu Chiochi ozo, mu l'ephe tugbaru nanu; gbahaepho unubedua kpurumu: oo unu bu ndu anuje mu iphe bya aburu unu bu ndu anataje l'eka mu. 16 Mbu je akpachakpo le teke mu no le Tesalonayika; unu shi emejeru mu mkpa; me mkpa byaru mu; mbu ebe o bukwa ugbo lanu kpu be unu meru mu iya. 17 O to bukwa iphe ono, unu anuje mu ono be mu ele enya iya; o chia iphe, mu ele enya iya bu g'urwu gbaaru unu berebere. 18 Mu natakotawaru iphemiphe

ono, unu nuru Epafurodayitosu g'o wotaru mu ono. Oo-sukpokwaaru iphe, mu eme iya tsufu etsufu. Iphe ono be unu vuru nu iya k'anyinyi. Iphe ono, unu nuru mu ono du ge ngweja, eshi kwekweekwee; ngweja, mkpo iya akpu tuuu alapfu Chileke. Mkpọ iya ono atso Chileke utso; k'ophu o gboberu eka labo nata iya. ¹⁹ Le Chileke mu a-nukotakwaa unu iphe, bukpo iphe, mkpa iya duru unu. O buru l'iphe o nweru, odu-biribiri iya dakiri atu onu iya ono, shi l'eka Kereshi Jizosu ono be o-shi mee ya. ²⁰ G'o buru Chileke ono, bu iya bu Nna anyi be ajaja l'a-buru nkiya jasụ le tuutuutuu le mimiimii. Nokwa g'o du.

Ekele mkpochi-ishi

²¹ Unu keleru mu iphe, bu ndu-nso l'ehu l'ehu; mbu ndu ono, no l'eka Kereshi Jizosu ono. Unwunna anyi ndu mu l'ephe no l'eka-a l'ekekwapho unu. ²² Iphe, bukpo ndu-nso, nokota l'eka-a g'ephe ha l'ekekota unu-o; kelekele ke ndu bu l'ibe eze nnajioha, bu Siza. ²³ Ge Nnajiuphu, bu Jizosu Kereshi meeru unu eze-iphe-oma-o. Nokwa g'o du.

Bayiburu Izii
Izii: Bayiburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

c6885c7c-c550-5b8b-a4fe-4bd714af4f6d